

Inuussutissarsiutigalugu piniartut nannuttamik amiinik qapiartitsisarnerannut suliaritinneqarneranut akiusut malillugit akilerneqartarneranut akiliutaasup 50%-anik taperneqartarlernissaannik, ilanngullu angallannera Naalakkersuisut peqquneqarnissaannik Inatsisartut aalajangiiffigisassaattut siunnersuut. Nunat tamalaat nannut amiinik piniartut niueruteqarsinnaanerata inerteqqutigaat, tamaalilluni piniartut nannut amiinik tunisisinnaanerannut periarfissaarunnerannut taarsiutitut tapiissutip siunertaqarpoq

pillugu

Aalisarnermut, Piniarnermut Nunalerinermullu Ataatsimiititaliap

siunnersuutip aappassaaneernejarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Henrik Fleischer, Siumut, siulittaasoq
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia
Inatsisartunut ilaasortaq Karl Kristian Kruse, Siumut
Inatsisartunut ilaasortaq Steen Lynge, Demokraatit
Inatsisartunut ilaasortaq Múte Bourup Egede, Inuit Ataqtigiit
Inatsisartunut ilaasortaq Hans Enoksen, Partii Naleraq
Inatsisartunut ilaasortaq Erik Jensen, Siumut

UKA 2019-imi ulloq 12. november 2019-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Inuussutissarsiutigalugu piniartut nannuttaasa suliarineqarnerannut, angallanneqarnerat ilanngullugu, akiliutaasut 50 %-iisa tapiissutigineqartalernissaannik atuutilersitsinissamik Naalakkersuisut siunnersuutikkut peqquneqassapput. Siunnersuuteqarnermi siunertaavoq nannut amiisa Kalaallit Nunaanneersut niuerutigineqarnissaannik nunat tamalaanit inerteqquteqarallannerup nassatarisaanik piniartut isertitaqarnissamut periarfissaarunnerannut taarteqartitsinissaq.

Siunnersuutip Inatsisartunit siullermeernejarnera

Siunnersuut siullermeerneqarami partiinit amerlanerussuteqartunit taparserneqarpoq. Naalakkersuisut akissuteqaamminni 15. oktober 2019-imeersumi oqaatigaat tapiissutip aningaasanut inatsimmut allannguutissatut siunnersuuteqarnikkut ilanngunneqarnissaa piareersimaffigitsik.

Ataatsimiititaliap siunnersuummik suliarinninera

Nannunniarneq amiinillu niueruteqarneq kulturitsinnut pingaaruteqartut ilagigaat ataatsimiititaliaq isumaqarpoq. Siunnersuutip piviusunngortinneqarnera inuussutissarsiutigalugu piniartut nannuttartut nannullu amiinik suliarisanik tunisisartut aningaasaqarnikkut atugaannik pitsanngoriartitsissasoq ataatsimiititaliamit maluginiarneqarpoq.

Nannut amiinik Kalaallit Nunaanneersunik pisinissamut tunisinissamullu nunat tamalaat maanna inerteqquteqarmata, nunatsinnili nannut amiinik niueruteqarnissaq inerteqqutaanngimmat ataatsimiititaliamit oqaatigineqassaaq. Kiisalu nannut amii Great Greenlandimut ullumikkut tunineqarsinnaanngimmata, taamaattorli inuussutissarsiutigalugu piniartut akiliillutik nannut amiinik Great Greenlandimut suliarisassanngortitsisinnaammata ataatsimiititaliamit oqaatigineqassaaq.

Nunatta tunuani nannut qanoq amerlatiginerat maanna kisitsisaatigineqanngilaq. Nunatta tunuani nannut qassiuinnerannik missingiinarneq Pinngortitaleriffimmit maanna ingerlanneqarpoq. Misissuineq 2022-p aallartilaarnerani naammassineqartussatut naatsorsuutigineqarpoq.¹

Misissuinerup naammassineqarnissaa ataatsimiititaliamit qilanaarineqarpoq, taamaalilluni misissuinerup kingorna sapinngisamik piaartumik nunatta tunuani siunnersuinermik nutaamik Pinngortitaleriffik tunniussisinnaaqullugu.

2020-mi nannuttassiissutit tamakkiisut 156-iusussatut Naalakkersuisunit aalajangiunneqarput. Taakku 2019-imi pisassiissutit amerlaqatigaat.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

¹ Nannut pillugit aqutsinissamut pilersaarut, APNN, februar 2019 (kalaallisuuani danskisuuani qup. 7)

Tamanna naapertorlugu siunnersuutip piviusunnngortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Aningaasat ukiumut tagginneqartut 85.000 kr.-iusut pillugit ataatsimiititaliaq oqaaseqaatissaqanngilaq.

Ataatsimiititaliap inassuteqaatai

Siuliani allassimasunik oqaaseqaateqarlutik amerlanerussuteqartut Siumumeersut, Inuit Ataqtigiinneersut aamma Partii Naleqqameersut siunnersuut akuerineqassasoq inassutigaat.


Nannunniarneq amiinillu niueruteqarneq kulturitsinni pingaarutilinnut ilaasoq ikinnerussuteqartup Demokraatineersup akuersaarpaa. Peqatigitillugulu Demokraatit isumaqarlutik nannut amiinik niueruteqarneq tapiissutit tunuliaqutiginagit niuerfinnili atugassarititaasut tunngavigalugit pissasoq. Nannut amiinik tunisisarneq piniartunut ullumikkut akilersinnaareermat nannut amiinik suliarinninnermut tapiissutinik atuutilersitsinissamut nunatta karsianit aningaasanik atuinissaq naapertuutinningsutut Demokraatinit isigineqarpoq.

Taama oqaaseqarlutik siunnersuut itigartinneqassasoq Demokraatit inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Henrik Fleischer
Siulittaasoq



Aqqaluaq B. Egede
Siulittaasup tullia




Steen Lyng




Múte B. Egede



Karl Kristian Kruse

For 

Hans Enoksen



Erik Jensen